

DE
CROTONIS TIGLII
OLEO

DISSERTATIO
INAUGURALIS MEDICA

QUAM
CONSENSU ET AUCTORITATE GRATIOSI
MEDICORUM ORDINIS

IN
UNIVERSITATE LITTERARIA BEROLINENSI
UT SUMMI

IN MEDICINA ET CHIRURGIA HONORES
RITE SIBI CONCEDANTUR,
DIE XIX. M. NOVEMBRIS A. MDCCCXXV.

H. L. Q. S.
PUBLICE DEFENDET

AUCTOR
GUSTAVUS LEOPOLDUS CRUSE

REGIOMONTO - BORVSSUS

OPPONENTIBUS:

R. MOLINEUS, MED. DR.

W. CRUSE, MED. DR.

C. SCHAPER, MED. DR.

BEROLINI
FORMIS BRÜSCHCKIANIS.

THE UNIVERSITY OF CHICAGO

LIBRARY

1911

THE UNIVERSITY OF CHICAGO

LIBRARY

1911

THE UNIVERSITY OF CHICAGO

LIBRARY

1911

THE UNIVERSITY OF CHICAGO

LIBRARY

1911

THE UNIVERSITY OF CHICAGO

LIBRARY

1911

THE UNIVERSITY OF CHICAGO

LIBRARY

1911

THE UNIVERSITY OF CHICAGO

LIBRARY

1911

PATRI DILECTISSIMO

IOH. CHR. CRUSE

MEDICINAE DOCTORI, REGI A CONSILIIS AULICIS, ME-

DICO PRACTICO APUD REGIOMONTANOS.



Doctrinarum, quibus medicus imbutus sit, oportet, illa quam Materiam medicam appellamus, haud parvi aestimanda est, quia morhis bene dignotis et via, quam ingressi iis medeamur, multum interest, remedia quoque, et vires, quas in corpus humanum exercent pernoscere, quibus utentes sanandi finem quam certissime assequamur. Singulorum medicaminum historiam attendentes, modo magno in pretio eadem fuisse, modo minoris habita esse, tum vero omnino e medicamentorum apparatu exulavisse inveniemus efficacissima, secundum auctoritatem praeceptorum et systematum, quae singulis temporibus in medicina plurimum valuerunt. Hanc eandem conditionem oleum quoque catharticum sortitum est, de quo in hoc libello verba facere mihi proposui, oleum

scilicet quod in fructibus Crotonis Tiglii continetur: veteres namque hoc purgans efficacissimum praescribebant; serius medici vires eius vehementissimas et vel lethiferas, si incautius adhibeatur, veriti, ab omni eius usu in morbis abstinebant; nuperrime vero in lucem rursus vocatum et summo opere celebratum a permultis adhibetur medicis practicis.

Summas huius olei commendationes quotidie audientem et multa de eius efficacia legentem exempla, magna me cepit cupiditas accuratiores imbui scientia omnium quae ad id pertineant; et ad dissertationem, quae mihi erat scribenda ut summos in utraque medicina assequeretur honores, aptissimum hoc mihi visum est thema. Diligentius igitur huius medicamenti querebam notitias; et liberos de materia medica scriptos et commentaria literaria et opera, in quibus de eo notitias suspicabar perscrutans: ad veterum dicta semper reverti reperiebam recentiores, veterum allegantes scripta, adiectis nonnullis quae ipsi invenerint experientia. Et ipse ad veterum scripta confugiens, maximam partem ex iis, quae nunc quidem ut res novae narrantur, iam ibi contineri perspexi; unde et mihi liceat, veterum referenti effata, recentiorum cum his componere experientias, ut exinde, quantum valeam, medicamenti huius redi-vivi virtutes exponam.

Scio equidem iam dissertationem exstare de medicis virtutibus, quibus gaudet Croton Tiglium auctore Leo Vita Finzi, et aliam Recherches sur les propriétés médicales et l'emploi en médecine de l'huile de Croton Tiglium par Dr. W. E. E. Conwell quarum neutram evolvere mihi contigit, sed summatim tantum excerpta legere quae in libro a Conwell edito continentur; verum enim vero hoc meum libellulum cum illo comparare nunquam in mentem mihi veniet, cui non licuit ipsi experimenta facere, sed iam relata tantum in ordinem quendam redacta proferre. Multos insuper liberos qui inspiciendi mihi erant, assequi non potui (quanquam magna eorum, quibus egebam, parte virorum doctissimorum quorundam benignitatem me impertiisse, libenter gratissimo profiteor animo) ita ut de nonnullis, quae absoluta proferre non possem, omnino potius reticendum mihi esse censerem, et opusculum hoc quamvis sit mancum, absolvere cogerer, tempore urgente. Etiam si nullum aliud habeat pretium haec dissertatio; hoc tamen praestitit, ut ipse accuratorem olei Crotonis Tigilii notitiam assecutus sim.

§. I.

Priusquam ad aliam quamcunque Crotonis Tiglii commemorationem aggrediamur, botanica huius plantae descriptione opus est.

Croton Tiglium. L.

C. foliis ovatis, acuminatis, serratis, glabris, basi biglandulosis, petiolis folio brevioribus, racemis terminalibus. Sp. pl. ed. Wild, IV, 543.

Synonyma:

Ricinoides indica, folio lucido, fructu glabro, Grana Tiglia officinis dicto, Burm. Thes. Zeyl. 200, tab. 90.

Pinus indica, nucleo purgante, Bauh. Pin. 492.

Lignum Moluccense, foliis malvae, fructu avellanae minore, cortice molliore et nigricante, Pavana incolis. A Costa (in Clusii exotic. L. IX.) p. 277. 292. Bauh. pin. 593.

Granum molluccum; Bori. Rumph. herb. amboin. IV. p. 98. tab. 42.

Cadel avanacu. Rheed. hort. malab. II, 61 fig. 33. Raii hist. 166. 1855. suppl. 112. 666.

Purgier Croton. W.

Locus in systemate sexuali: Monoecia Monadelphica.

Ordo naturalis: Tricoccae L. Euphorbiae Iuss.

Arbuscula 8 - 10. pedalis. Radix lignosa, ramosissima. Caulis erectus, gracilis (bracchium vel pedem crassus Rumph.) cortice cinereo, molli. Rami divaricati, inferne nudi, superne foliosi, foliis inferioribus maioribus, sub apicem racemo terminatum sensim minoribus. Folia petiolata, petiolio fere longitudine foliorum, alterna, ovata vel ovato-oblonga, glabra, integra, mollia, basi biglandulosa, irregulariter serrata, acuminata, 2-5 pollicaria, pagina superiore intensiore, inferiore pallidiore, nervis prominentibus. Inflorescentia: racemus terminalis, floribus inferioribus foemineis, superioribus masculis. Flos masculus: calyx cylindricus 5 dentatus, corolla 5 petala, pallide flavescens, stamina indefinita 10 - 15, filamentis saepius connatis, germine abortivo quasi receptaculo impositis. Flos foemineus: calyx multifidus sub capsula reflexus, corolla nulla, styli tres bifidi. Capsula (ex Gaertnero) ovata, grandiuscula, coriacea, tennis, glabra, trigona, trisulca, tricocca. Dissepimenta tenuissima, fere membranacea. Color stramineo - pallidus. Semina ovata, solitaria, hinc convexa, inde obtusissime angulata, ad margines in aciem acutam extenuata, straminea, fusca aut nigricantia. Umbilici cicatrix simplex, parva, in extremitate seminis obtusiore atque superiore. In-

tegumentum exterius crustaceum, interius membranaceum, sericeo - album. Album carnosum, crassum. Embryo inversus, lacteus. Cotyledones ovato - cordatae, foliaceae, tenuissimae, Radicula brevissima, supera.

Habitat in Ceylon, Malabar, China, Cochinchina, insulis Moluccis; floret mense Augusto et Septembre.

§. 2.

Iam enumerandi mihi sunt libri, qui notationes ad hanc dissertationis meae materiem spectantes continent. Etsi multos eorum evolvere mihi met ipsi non licuit, omnes tamen quos in scriptis quae legi, citatos inveni, allegandos censui.

Caroli Clusii Atrebatensis Exoticorum Libri X
1605 Lib. nonus sive aromatum et medicamentorum in orientali India nascentium historia auctore Christophoro a Costa. p. 277.
292.

Rheede Hortus Indicus Malabaricus. Amstelodami
1678 II. p. 61. fig. 53.

Simon Pauli Quadripartitum botanicum. Argentorati 1667 p. 548.

Ioannis Raii Historia plantarum. Lond. 1688.
I. p. 167 II. p. 1805. 1855. III. 112. 666.

Casp. Bauhini Pinax theatri botanici p. 393.
492.

- Rumphii Herbarium Amboinense. Amstelodami
1750 T. IV. p. 98 tab. 42.
- Pauli Hermanni Cynosura materiae medicae.
Argentorati 1726 pag. 239. 338.
- Ioannis Burmanni Thesaurus Zeylanicus. Am-
stelodami 1757. p. 200. tab. 90.
- Geoffroy Tractatus de materia medica. Parisiis
1741. II. p. 428.
- Lemery Traité universel des drogues simples.
Paris 1714 p. 723.
- Lewis Materia medica a. d. Engl. Zuerich 1771
p. 486.
- Bergius Materia medica e regno vegetabili.
Holm. 1778.
- Triller Dispensatorium pharmac. univers. Erfurt.
1764. I. p. 194.
- Grimii Laboratorium Ceylanicum p. 103.
- Murray Apparatus medicaminum. Gotting. 1787
IV. p. 149.
- Hahnemann Apothekerlexicon Leipz. 1798. II.
p. 255.
- Ios. Schneider Ueber Systemsucht unter den
Aerzten nebst einem Anhang über I. Arrow-
Root u. II. das Croton Oel. Fulda 1823.
- Richard Medicinische Botanik ed. Kunze u.
Kummer I. p. 337-342.
- Recentiorum observationes et relationes de
oleo Crotonis Tiglii ex maxima parte in variis

commentariis literariis continentur quae Journal Magazin, Repertorium et similiter audiunt. Ex his reliquorum gentium scriptis notitias de oleo Crot. Tigl. memoratu dignissimas in commentariis literariis quae in Germania prodeunt, excerptas aut recusas invenimus.

§. 3.

Fructus Crotonis Tiglii: Grana Tiglii, Tillii, Tilli, Gr. Tiglia, Gr. Mollucca, Pinei nuclei Moluccani, Pignons d'Inde, Purgiernüsslein, Purgierkörner, Granatillkörner nuncupantur 1); oleum ex iis expressum nomine olei Crotonis in usu est. Non autem hoc nomen servare possumus: est enim Croton genus plantarum, plus octoginta continens species; non igitur nomine olei Crotonis designatum est, quatenus Crotonum species hoc oleum

1) De variis nominibus conf. Costa, Rheede, Burm. Rumph. Nonnulla nominum, quibus apud incolas designatur, vires aut usum eius significant „Iapalu Malabaris dicitur, Gaiapala, Nepalam et Wayapali Zeylonensibus a Wayya qui illis morbus frigidus est, nervos et artus occupans atque contrahens, cui huius fructus medentur. Gaya victorem significat, Pala regem qui olim his usus fuit“ Burm. „— Latine Granum moluccum, vulgo Bori dictum, quod omnes denotat fructus quibus pisces et aves inficiuntur et enecantur. Ternatice autem proprie vocatur Jets, quod vomitum excitat —“ Rumph.

nobis suppeditet, ita ut omnes species huius generis idem praebere medicamentum e nomine intelligi oporteat, aut cuius singularum specierum eius procreatio sit adscribenda. Rectius igitur hoc oleum *Oleum Tiglii* appellandum erit.

Oleum Tiglii quale Short vendit, monopolio a Rege Angliae munitus, in vitris continetur, drachmae circiter unius capacibus: colore melleo, limpidum, odorem referens resinae Ialappinae simillimum 1), in alkohol et aethere difficile solvitur. Oleum quod apud nos prelo elicitur, intensiore colore et crassius 2) est: fortasse quia oleum quod Short vendit, e recentibus paratur seminibus (an coctione?) quae hic non prostant. Ceterum Iliff 3) et Frost 4) questi sunt, oleum, quod nunc accipimus, non eadem esse efficacia cum eo quod antea nobis suppeditatum erat.

§. 4.

Non autem fructus tantum cum oleo quod continent, efficaciam exhibent magnam, sed „in tota planta vehemens detegitur fervor, ipsum superans piper, reliquasque calidas plantas“

1) Buchner Repertorium T. XIV. p. 302.

2) Pfaff Syst. der Mat. med. T. VII. p. 50.

3) Americ. medic. Record. T. V. p. 376 sqq.

4) Americ. med. Record. T. V. p. 615 sqq.

Rumph. Ad singularum igitur nunc transeamus partium eius examen, magnam ad partem scriptorum, in regionibus, quibus haec stirps indigena, degentium, relata secuti. „Radices sunt longae in multos longos quasi vermes divisae, nigricantes, rugosae et lentae, in quibus ardor per gradum debilior est quam ossiculorum“ Rumph. „Lignum Panava, Pavana, lignum Moluccense est spongiosum, leve, rarum, pallidum, tenui cortice cinereo obductum, saporis acris mordacis et caustici, odoris nauseosi; recens et adhuc vegetum adeo potens est, ut serum et aquas tam per vomitum quam per alvum expellat, relinquens ob intensam sui acredinem in ano inflammationem“ Herm. „Folia gustata, valde acria deprehenduntur et linguam diu vellicant“ Costa; imo summam acredinem omnium stirpis huius partium ea continere Rumphius narrat, et Rheede de viribus eorum purgativis commemorat. Semen virtutem nemo est scriptorum qui non laude accumulet; quod autem attinet ad partes seminum, quibus acredinem tribuant, alteri ab alteris discrepant. „Cortices (i. e. putamina) blandius purgant ac ipsa substantia interior“ teste Hermann, quos contra omni virtute purgativa carere Nimmo contendit, experimentis nisus quae instituit. Burmannus vellus quoddam exiguum quod fructus intus habent, eximi iubet „quod si

non factum sit, et simul assumatur, hic vel illic in corpore adhaerescit, unde incommodae proveniunt operationes.“ Eandem sententiam, nisi fallor, Rumphius his profert verbis: „dicitur si pellicula media tollatur, innoxie adsumi posse,“ ita ut vellus istud Burm. et pellicula media Rumphii idem hoc sit quod est integumentum interius membranaceum Gaertneri. Nullum vero aliorum scriptorum, qui huius rei mentionem fecerit, equidem invenire potui, et si re vera res ita se haberet, effectus hic derivari non posset mechanica illa irritatione quam sibi fingit Burmannus. Nimmo videlicet de hoc integumento separatim verba non facit, nec in seminum a putaminibus liberatorum, nec in putaminum analysi (quibuscum una in haec integumenta inquisivisse mihi videtur) hanc nocivam commemorat indolem (cf. §. 6.); qua de causa non experientia sed falso quodam ratiocinio potius hanc sententiam irrepsisse versimillimum videtur. Granorum vim concretam esse iu embryo, iam Hermannus adnotavit et post eum Geoffroy; verum albumen etiam hac acredine non carere, Caventou certiores nos facit. 1)

1) Froriep. Notizen T. IX. Maerz 1825 p. 316.

§. 5.

Haud opus est, nonnullorum opiniones iam diu refutatas, denuo refellere, scilicet seminum Crotonis Tiglii et olei ex iis expressi vires medicatrices in acrimonia quadam rancida ponentium, quam in his medicaminibus per longum tempus repositis, olei pinguis quod continent degeneratione rancida oriri ratiocinabantur. Fructibus iam innata est haec acredo, quod e. g. exponit Odier 1), oleum escharoticum Ricini (Huile de pignons d'Inde) non esse oleum expressum Ricini communis, rancore degravatum, sed oleum e granis Tiglii prelo elicatum, disertissime praedicans. Et fructus, ad perfectam nondum provectos maturitatem, quanquam suavi praeditos sapore, acrimoniae quae maturis inhaeret partem reconditam habere, Geoffroy 2) nobis est testis.

1) Sammlung auserles. Adhandl. für pract. Aerzte T. V. 236.

2) Dictionaire des sciences medicales Paris 1813 T. VII. p. 411. Etant a nous promener pres du village de Bain, non loin du Cap-Vert, nous trovâmes plusieurs Crotons en fruit. La plupart d'entre nous en mangèrent; j'en pris des amandes pour ma part: elles nous parurent fort agreables à tous; mais au bout d'environ deux heures, nous étant ombarqués, pour revenir a l'île de Gorée, nous fûmes tous attaqués de vomisse-

§. 6.

Iam veteres non fugit, oleum quod in Granis Tiglii continetur, ex duabus coalitum esse partibus constituentibus, altera oleosa, altera acri: Lemery 1) e. g. Grana Tiglii multum olei et salis continere narrat; Burmannus 2) his utitur verbis „Fructus calidam et acriter salsam oleositatem habent.“ Hermannus iam accuratius, purgans eos appellat, sale purgante tam fixo quam volatili constans. Recentiores, chemicas et fructuum et olei quod continent analyses instituentes, singularum partium qualitates, quantitates, vires pro scientiarum hodierno statu investigarunt.

Nimmo 3) Grana Tiglii asseverat putaminum exhibere partes novem, nucleorum vero sedecim, quam eandem fere proportionem Caventou 4) proponit, putaminum pondus nucleorum dimidio aequiparans: Nimmo in nucleorum partibus

mens violens. Un seul d'entre nous en fut exempt, et il remarqua qu'il avait bu quelques gorgées d'eau de vie: sur cette indication nous en fîmes usage, et bientôt les vomissemens se calmèrent sans aucune suite. Cet accident m'engagea à étudier la plante que je reconnus bientôt pour le Croton Tiglium.

1) Traité univ. des drogues simples Paris 1714. p. 728.

2) Burm. Thes. Zeylanic.

3) Froriep Notizen T. VII. April 1824. p. 7. sqq.

4) Froriep Notizen T. IX. März 1825. p. 316. sqq.

quinque olei invenit partes tres, Caventou dimidium totius ponderis oleo tribuit; Schneidero contra contigit (l. c.) ut ex nucleorum unciiis 26, olei uncias 6 tantum eliceret. Proportiones illae quas Nimmo atque Caventou experti sunt, non multum inter se differunt, et congruent, leviores si indulgeas alterutri aut utrique in pertractatione seminum incurias; Schneideri disquisitiones vero ponderum rationem adeo differentem ab istis prae-buisse, non mirandum mihi videtur, cum hic oleum prelo elicuerit, chemicis illi operationibus. 1)

Exstat analysis chemica fructuum *Jatrophae Curcados* a Pelletier et Caveutou anno 1818 instituta 2), in qua hoc quidem nomine errasse serius confitetur Caventou, dum semina ista *Jatrophae Curcados* fuisse retulerit quae revera *Crotonis*

-
- 1) Permultum olei et principii acris, recrementis, e quibus prelo non amplius olei guttulae exprimi possunt, adhuc inhaerere, Short nuperrime nobiscum communicavit, hanc referens experientiam. Ad alvum equis ducendam efficacissimis uti purgantibus oportet, ita ut olei Tiglii guttis XV - XX in hunc finem opus sit; eundem vero praebuerunt effectum scrupulus unus ad drachmam dimidiam e recrementis illis. *Froriep Notizen T. X. April 1825. p. 159.*
 - 2) *Journ. de Pharmacie Nr. VII. 1818 recus. in Buchner Repert. T. VI. 1819. p. 300 sqq.*

Tigllii femina fuerint 1); quam ut argumentis fulciat affirmationem, et aliorum allegat testimonia et efficaciam huius olei in homines aequae ac in animalia, olei Tigllii virtutes adaequantem. Haec sunt quae dedit analysis ista: Aether sulphuricus et Alkohol vini ex his granis a putaminibus liberatis et in mortario contritis, oleum acre solvunt, insolubilem sibi relinquentes massam quae cum aqua contrita emulsionem praebet, et ex albumine gummi et lignosis constat fibris. Oleum hoc flavum densatur ubi temperies est + 5° R. congelascit vero ubi ad 0° R. usque imminuta est; solvitur in Alkohol vini sed non in aqua; chartae succo plantarum coeruleo illitae colorem in rubrum mutat; igini admotum partim in vapores mutatum abit, intolerabili odore atque acredine vehementer oculos nares faucesque irri-

1) Apud Gallos Grana Tigllii Pignons d'Inde audiunt. Encyclop. bot. Paris 1786. T. II. p. 208. Dict. des sc. med. Paris 1813. T. VII. p. 411. Sunt autem multi qui hoc nomen fructibus Jatrophae Curcados tribuant, quae alias Medicinier cathartique vocatur e. g. Dict. des sc. med. par une soc. des med. et chir. Paris 1820. T. 42. p. 442. Encyclop. ou Dict. rais. des sc. etc. Paris 1779 ita ut magna inde rerum et nominum oriatur confusio. De permistione nominum quae Crotoni Tigl. et Jatrophae Curc. conveniunt, Frost etiam questus est: Americ. med. record. T. V. p. 615 sqq.

tante praeditos, partim in carbonem mutatum remanet. Kali causticum quod spiritu vini solutum huic oleo admiscitur, saponem cum eo componit nigricantem, in aqua solubilem, mollem, inodorum, cui si addas Acidum tartaricum, odore illo penetrante statim prodeunte, oleum a Kali seceratur, omni fere sine odore et sapore; materia quae hos exhibet, in illo fluido, cui Kali tartaricum inest, soluta destillatione detecta est, Baryta, fluido huic per destillationem elicto inmixta, album componit praecipitatum, cui Acido phosphorico instillato, olei pernotus odor rursus se prodit. Eodem modo Magnesia pura cum Oleo Tiglii ex aqua cocta, magnam acredinis partem oleo demit; ipsa verum deinde aqua solvitur, et acido aliquo huic solutioni instillato, volatilem itidem manifestat acredinem. His experimentis nisi Pelletier et Caventou acidum peculiare quoddam volatile Oleo Tiglii vires suas insignes tribuere rati sunt, et hoc acidum Acidum Jatrophicum denominare non dubitaverunt, fructus scilicet qui oleum ipsis praebuerant, Jatrophae Curc. semina existimantes.

Nimmo has nobis dat partium grana et oleum Tiglii constituentium proportiones. Centum partes seminum a putaminibus liberatorum continent partes:

27,5 materieï acris in Alkohol solubilis,
32,5 olei crassi in Ol. Terebinthinae
solubilis,

40,0 massae farinosae non solubilis.

100

Oleum vero continet

45 partes principii acris

55 olei pinguis, Oleo Olivarum si-
millimi.

Alkohol acredinem quidem omnem, verum non perfecte oleum omne e granis extrahere valet; partem huius remanentem Ol. Terebinthinae solvit. Aether sulphuricus, et Alkohol vini et olei Terebinthinae vires in Oleum Tiglii iunctas continens, omne oleum cum acredine sua solvit. Aqua, solutioni olei in Alkohol admixta, sedimentum statim generat, quo per filtrum separato, aqua ab Alkohol seiuncta limpida ne pauxillum quidem acredinis continens reperitur. Solvitur Oleum Tiglii omnibus oleis tam pinguibus quam aethereis. Nimmo item acre principium Granorum Tiglii acidum quoddam peculiare esse suspicatur, cuius efficaciam in reagentia acidorem non validam invenit.

Pelletier et Caventou (l. c) de acidi volatilis indole nonnulla habent: immissum in tubulum ad frigus usque — 5° R. refrigeratum, illico congelascit, odore quem exhalat valde imminuto,

qui multo vehementior procedit, simulac temperies ad $+ 1^{\circ}$ R. ad $+ 2^{\circ}$ R. aucta sit. Acidum hoc volatile succi plantarum colorem coeruleum in rubicundum mutat, sapore notatur acri, odore nauseoso, basibus saturatum cum iis se coniungit, acidorum admixtione rursus liberatur. Notatu dignum videtur, acidum hoc volatile per se tanta non gaudere acrimonia, qualem exercet coniunctum cum oleo crasso.

Brandes 1) acidum, Acido Jatrophico simillimum in Granis Tiglii reconditum se invenisse narrat; substantiam acrem materiae cuidam inesse resinosae, Alkohol vini et Aethere sulphurico solubili, itemque oleis pinguibus et aethereis, magnamque huic substantiae cum Elaterino (e fructibus Momordicae Elaterii) esse similitudinem, qua de re Tiglinum appellanda sit, Journ. de Pharmac. Marz 1823 nos edocet. Buchner 2) de acido, acido Jatrophico simillimo, vel cum eo congruente, et de substantia quadam Alkaloid dicta refert; Caventou recentioribus nisus experimentis, acre illud, acidum non esse nunc quidem contendit 3), et Adrien de Jussieu 4) substantiam

1) Brandes Archiv. T. V. p. 203.

2) Buchner Repertorium. T. XV. p. 431.

3) Prorieip Notizen. T. IX. Maerz 1825. p. 316.

4) Prorieip Notizen. T. IX. Decemb. 1824. p. 72.

resinosam, quam vires drasticas Olei Tiglii continere asseverat, Tiglinum nominatam, ex eo educere valuit.

§. 7.

Qualiscunque vero sit substantiae acris totius plantae inhaerentis natura, medici hoc non tantum interest ac chemici; sed fidenter hoc medicamento utitur, dummodo effectuum eius in corpus humanum cognitionem, experimentis et observationibus idoneis stabilitam, in promptu habeat; et praesto sunt multa, tum a veteribus tum a recentioribus scriptoribus allegata efficaciae Crotonis Tiglii in corpora hominum et animalium exempla, quae nunc recenseamus.

Externe applicatum vim exercet et topicis se manifestantem affectionibus, et toti corpori se communicantibus. Affectiones, quas procreat, topicae ex his cognoscuntur: Grana Tiglia ex aqua trita, impetiginibus inuncta admodum urunt (Costa); calorem excitant et vesiculas „cunctis lenticulis sordidisque faciei maculis“ illita (Rumph); irritant etiam cutem omnibus carentem morborum affectionibus, quae inflammatur ubi fricatur hoc oleo, inflammatione per horas et vel dies durante 1), atque umbilico inunctum exanthema ibi

1) Graefe u. v. Walther Journ. T. IV. p. 184.

procreat 1). Cloquet 2) oleum hoc acre, amarum, quod Alkohol ope eduxerat, exigua quantitate cuti admotum, brevi tempore medicamento rube-
facientis dolorifici effectum praestare asseverat; quin imo eadem efficacia ac causticum potentiale crustam siccam nigram id produxisse refert, per decem horas canis femori impositum, a quo pili antea abrasi fuerant.

Non autem opus est olei ipsius tactu ad hunc finem, cum substantia illa acris volatilis, aut granorum tritu aut calore aut chemicis operationibus in vapores mutata, hunc eundem effectum praebeat: Caventou iuvenes duos, qui aliquod tempus degerant liberando semina Crotonis Tiglii a putaminibus, summam totius corporis irritationem et ardoris sensum in naribus ac faucibus percepisse narrat, eoque modo eos affectos fuisse, ut altero die palpebras vix dimovere potuerint, paspebris, naribus et tota facie summopere inflammatis 3). Porro operarius qui haec semina in mortario contuderat, erysipelas faciei nactus est 4); nec non Brandes, qui acidum illud volatile purum educere sibi proposuerat, atque prohibere

1) Froriep Notizen. T. VII. April 1824. p. 7.

2) Buchner Repert. T. VI. p. 300.

3) Froriep Notizen. T. IX. Maerz 1825. p. 316.

4) Graefe u. v. Walther Journ. T. IV. p. 184.

haud potuit quo minus vaporis ex oleo prodeuntis aliqua pars in conclave suum emanaret, postridie pessime se habuit: facies, palpebrae et labia intumuerant inflammata, circulo lato minutarum vesicularum oculos cingente. 1)

Irritationem igitur, dolores, inflammationem, pustulas et vel sphacelum Oleum Tiglii in eo loco excitare valet, cui assidue illinitur aut per tempus sat longum ad movetur; vapores ex eo prodeuntes eadem nocendi vi corpus humanum infestant, imprimis tunicas mucosas.

§. 8.

Alii sunt affectus quos externe applicatum, toti corporis oeconomiae infert hoc oleum: regioni umbilicali inunctum alvum ducere, ac si interne sumtum esset, Hermannus et multi alii testantur: guttas eius quinque brachio illitas nauseam, sudorem et auctam urinae secretionem movisse refert Convell 2); extremis digitis admotum stuporis sensum, digitos manum et brachium occupantem, oris siccitatem et capitis dolorem per aliquot horas perseverantem, oleum procreasse, observavit Frost 3). Huc pertinent quoque

1) Hufeland Journ. T. LVII. Julius 1823. p. 120.

2) Frouiep Notizen. T. VII. April 1824. p. 7.

3) Americ. med. record. T. V. p. 615.

quae apud Rumphium invenimus his verbis enarrata „— aquis stagnantibus iniecta (grana T.) sive purissime salsis, pisces enecant, sique baculum ex hac planta formatum sub scopulo vel excavata arbore intrudatur, pisces et cancri sub hisce latitantes, semi mortui prodeunt —“ Nescio equidem utrum pisces et cancri aqua vescantur, quae Granorum Tiglii pulvere impraegnata est, an potius in hac aqua degentes tantum sopiantur: ultima verisimilior mihi est sententia, Rumphii verba perpendenti, nam si altera vera fuisset, Rumphius certo dixisset, pisces et cancos semimortuos fieri postquam hac ex aqua bibissent.

Et si ultimum hoc exemplum ad rem nostram non pertinere concedam, elucet tamen, me quidem iudice, ex relatis, Croton Tiglium et in specie Oleum Tiglii, corporibus foris applicatum non alvum tantum movere urinasque, sed facultatibus etiam potiri quibusdam in systema nervorum specialem exercentibus vim.

§. 9.

Sive deglutitione Crot. Tigl pars assummat, sive una eum aëre inspiretur, effectus fere idem est; quod theoriam confirmare videtur, quam Conwell de eius efficacia proponit, Croton Tigl, scilicet non irritationi topicae particulae cuiusdam intestinorum vires suas purgativas debere,

nec intestina percurrens ea irritare (quod pauxillum eius quo utimur efficere non posset, dum insuper saepe vomitu evacuetur priusquam alios praebuerit effectus) sed absorptum, nervorum forsitan ope ad intestinorum tractum vires suas dirigere. Omittentes vero omnes huiusmodi coniecturas, ad relationem transeamus effectuum, quos a scriptoribus commemoratos invenimus.

Omnibus stripis partibus „vehemens“ inest „fervor, os labia et fauces adeo inflammans ut intumescant, qui vix tolerabilis est et usque in tertium persentitur diem“ Rumph. „Oleum ob exedentem sui acredinem fauces palatum et nonnunquam anum inflamat“. Hermannus. „solet lignum interdum in nonnullis ani pruritus et excoriationem excitare, atque in aliquibus (sed paucis admodum) haemorrhoides“ Costa. Murray 1) gustans nuclei pauxillum, lingua quidem acrimoniam non sensit sed paulo post in faucibus ardorem ingratum percepit, diu inhaerentem, vix prandio exstinguendum. Et si qua eius ingesta erat particula (quam fortasse inscii deglutiaverant cum saliva mixtam, qui gustandi causa masticaverant pauxillum granorum, vel olei guttulas linguae applicuerant, omnem vero masam

1) Murray apparatus. medicam. T. IV. p. 149.

illico expuerant; vel qui, dum nucleos terebant, halitum ex iis prodeuntem hauserant) pro quantitate ingesti multae sedes secutae sunt, interdum etiam vomitus.

Relationes quas Schneider 1) Brandes 2) et Buchner 3) dederunt, secutus, et his componens ea quae ipse expertus sum, cum Grani Tiglii partem circiter sextam masticassem; adumbrationem nunc apponam symptomatum quae oleum vel vapores quos exhalat, incaute in corpus ingesta sequi solent. — Percipitur ab initio olei pinguis aut nucis avellanae sapor in lingua, quem mox excipit ardor (ei non dissimilis quem tinctura Pimpinellae saxifragae exhibet) primum uvulam occupans, tum etiam fauces linguam et oesophagum urens; porro nausea, capitis dolor, horripilationes, horrores; crumpunt sudores cum magno anxietatis sensu, pulsu debili, parvo; accedunt in nonnullis colici dolores (quos equidem non suscepi sed plenitudinis tantum et molestiae in abdomine sensum) vomitiones, artuum gravitas, lassitudo, debilitas totius corporis, vomitus et alvi evacuationes creberrimae, serosae, perimulta

1) Schneider über Systemsucht. Auhang II. über Crotonoel.

2) Hucelard Journ. T. LVII. Julius 1823. p. 120.

3) Buchner Pharmacie. T. VII. p. 288.

intestinorum secreta fluida maximo cum impetu evacuantes. Si non nimium olei ingestum erat, postridie vires recuperant aegri, et fame ac siti maxima vexantur, nullumque aliud damnum ex hac purgatione trahunt: ipse enim ego, quem evacuationes per superiora et inferiora adeo affecerant, ut inde a secunda hora post assumptionem huius medicamenti spasmis tonicis extremorum inferiorum maxime dolorificis, quinimo febricula vexarer, postridie nullam passus sum morbosam affectionem, nisi quod urina turbida fuerit et vires nondum omnino recuperassem. Cum vero plus iusto propinetur, dolores colici vehementissimi sequuntur, nec raro sanguinis deiectiones (Conwell), intestinorum inflammationes, gangraena et mors.

§. 10.

Experimenta quae Conwell in canibus 1) instituit, edocent, Olei Tiglli guttam unam ad tres per os aut per anum ingestas, vomitum et deiectiones copiosas, faeculentas aequae ac serosas excitare omni sine intestinorum inflammatione. Guttis duodecim in ventriculum, et guttis quinque in venam iugularem iniectis, canes ingentes pati videbantur dolores, multum salivae spumidae vomentes et paucas mittentes deiectiones, quarum

1) Froriep Notizen. T. VII. April 1824. p. 12.

nonnullis sanguis immixtus erat. In cadaveribus canum post aliquod tempus interfectorum, oesophagus naturalem servans texturam repertus est, tunica verum interna ventriculi, duodeni, ieiuni et ilei mirum in modum inflammata, rubra, rubris quasi iniectionibus tincta; colon quoque et intestinum rectum inflammata inventa sunt, sed minori in gradu ac intestina tenuia: vesica urinaria urinae plena, viae urinales, bronchiorum membrana mucosa, canalis choledochus et cetera abdominis intestina omni ab inflammatione libera; cerebrum deinde et omnes reliquae corporis partes sanae repertae sunt.

§. 11.

In multis Indiae provinciis aucupes seminibus Crotonis Tiglii utuntur „huius pauxillum cum oryza cocta inixtum avibus sylvestribus exponunt; quae degustant, illico decidunt sopitae et stupidae, quae vero avidius id edunt, moriuntur antequam illis auxillium praeberi potest, quod est ut frigida caput perfundatur — Improbae etiam mulieres illarum provinciarum suis maritis parum aequae quatuor grana sive nueleos 1) edendos praebent ut eos interimant.“ Costa. Cum

1) Singuli nuclei pondere medicinali grana circiter sena aequant.

vero neque apud Costam neque apud Rumphium nec alium quempiam scriptorum, qui mentionem huius nequitae faciunt, nulla inveniatur notatio nec de effectus genere quem permagna illa dosis praebeat, nec de mortis ratione, nec de affectionibus, quas cadaverum dissetio, si instituta esset, demonstravisset: non possumus scire, num inflammatione et gangraena intestinorum correpti, an vi illa in systema nervorum influente extincti (quomodo aves illae sylvestres) mariti infelices exspiraverint. Mihi quidem ultima ratio probabilior est, quia viri, simulac ardorem in faucibus sensissent, hoc venenum accepisse edocti, idoneis illico uti potuissent remediis: si vero acre illud volatile narcoticos ut ita dicam, cito praebeat effectus, similes forsitan iis acidi Borussici, 1) liquet, quomodo foeminae quem sibi proposuerant finem assecutae sint. Vapor ex oleo elicito vim inesse nauseam et stuporem procreandi Brandes 2) ipse expertus est: sequitur ergo, hoc oleum non tantum eximia vi purgandi instructum esse, verum etiam viribus quibusdam sensibilitatem egre-

1) Buchner Repert. T. VI. p. 300. acidum e granis Tiglii eductum cum acido Borussico a perito quodam chemico comparatum iri optat, magnas inde scientiae augurans fructus.

2) Hufeland Journ. T. LVII, Julius 1824. p. 120.

gie afficientibus, quod Hahnemann 1) iam pronuntiavit.

§. 12.

Quod si olei virtutes in praecedentibus paragraphis expositas, nunc summationem enumeremus, hasce inveniemus: externe vel interne applicatum, irritationem ac inflammationem excitare valet, alvi urinarum et sudoris excretionem promovet et vium quandam in systema nervorum exercet depressivam, quae nauseam et soporem infert. Hoc respicientes, usum quem praestat in medicina nunc explicemus, indicantes ad quosnam morbos sanandos eo utimur.

§. 13.

Irritat, inflammat atque suppurationem provocat, exedens partes quibus imponitur, secretionem ibi adaugens et alterans: ad hunc finem impetigines (Costa) capitis pustulae (Rheede) lenticulae sordidaeque faciei maculae (Rumph.) eo illiniuntur; adhibitum est etiam in inflammatis haemorrhoidibus caecis et carunculis anni exedendis (Herm.). Lignum (et folia) in pulverem redactum, morsibus animalium venenatorum, vulneribus quae a sagittis toxico illitis facta sunt, et vulneribus ve-

3) Hahnemanns Apotheker-Lexicon. T. II. p. 255. sqq.

nenatis omnibus inspergitur (Costa, Rheede) in quibus primo parum urit, dein vero omne extrahit venenum ac dolorem sedat (Rumph.); mor sui canis rabidi impositum, eandem sane vim medicatricem exercebit oleum, et suppurationem ibi continuo promovens et virus delens, Emplastro Cantharidum simile. Inunguntur quoque oleo corporis partes, ex apoplexia paralysi correptae, 1) et in affectionibus rheumaticis eo utimur externe 2).

Alia est olei applicatio externa, ubi regioni umbilicali infricatur ut alvus moveatur, quae quidem fieri potest et in infantibus, qui omnia medicamina repudient, et ubi evacuationem per alvum summopere necessariam existimamus in hominibus trismo, tetano, apoplexia, hydrophobia, mania correptis, quorum maxillas dimovere non possumus vel qui purgantia ore recipere non valeant aut nolint (Conwell, Hufeland multique alii):

§. 14.

Intus adhibitum obstipationes Oleum Tiglli solvit tenacissimas, et si per sex, septem ad

1) Pfaff Syst. d. Mat. med. T. VII, p. 52.

2) Magendie Vorschriften zur Bereitung u. Anwendung einiger neuen Arzneimittel a. d. F. Leipz. 1824. p. 112.

octo dies perduraverint, cuius exempla nobis affert Iliff 1); immo infans, quod per tres dies adstrictam habuerat alvum, pluries sine doloribus deiecit postquam lactem matris suxerat, quae oleum antea sumserat. Plurimum igitur valet ad alvum movendam, quae iam natura sua tardior, aut multis infarcta est scybalis et flatibus (Costa, Schneider et multi alii recentiorum.) Medetur corporibus fibra laxa donatis, constitutionibus leucophlegmaticis, pituitam, humores serosos, viscidos et tenaces expellens, motum peristalticum adaugens, lumbricos simul enecans et taeniam 2) aliosque in genere vermes hominum intestinis familiares (Costa, Rajus, Herm., Rumph, Schneider, Tantini 3) etc.) Est ideo inter praestantissima purgantia quae infantibus morbo scrofuloso laborantibus praeberi possunt, cum etiam appetentiam deiectam revocat (Costa). Bilem nimis copiose secretam et in intestina atque ventriculum effu-

1) Americ. med. record. T. V. p. 376.

2) Exemplum maximae ad expellendos Lumbricos efficaciae, qua gaudet Cr. T. nobiscum communicat Cohausen in Act. med. phys. acad. Caesar. nat. cur. T. IX. November 1752. p. 34.

3) Gerson u. Julius Magazin. Januar, Februar 1824. p. 196.

sam, optime evacuat 1) (White 2) Nimmo 3) et icterum, spasmo aut obstructione viscerum et canalium bilem ferentium progeritum, sanat. Corporibus nimis succulentis, ad obesitatem proclivibus, quibusque sanguis in caput congeritur, multum affert levaminis, et cum diaeta sibi respondente coniunctum, habitum funditus meliorem reddit (Nimmo). Eodem sane modo, derivatione scilicet per intestina, inveteratos capitis dolores, hemicraniam, aurium tinnitum, levat (Costa), obstipationes solvit melancholia et hysteria laborantium (Tantini), et maniae anglorum (Spleen) inveteratae paroxysmos olei quotidianis dosibus prohibere Marschall valuit 4). Hominibus Opii usu assuetis, optime alvum ducit (Tantini) quod etiam in colica saturuina praestitisse, Kinglake nobis auctor est 5): oleum cum Opio coniunctum Nimmo dedit in morbo Delirium tremens appellato. Prodest oleum in stadio primo febrium, evacuationem idoneam provocando (Marschall ap. Hufel. l. c.); in sananda mania et

1) Huc pertinet, nisi fallor, quod dicit Costa, convenire lignum „iliacis colicisque doloribus“ et „saevis-
sissimae cholericæ passioni.“

2) Hufeland Journ. September 1822. p. 109.

3) Gerson u. Julius Magazin. T. IV. 1822. p. 112.

4) Hufeland Journ. September 1822. p. 109.

5) Salzburger med. chir. Zeitung. Mai 1825 Nr. 41.

apoplexia magnam sibi laudem paravit (Conwell Tuthill 1) et alii): maximis vero laudibus effertur ab omnibus et veteribus et recentioribus scriptoribus ob eximiam suam praestantiam contra omnes affectus hydropicos cum cutis tum abdominis tum pectoris, quos interdum omnino sanat, et si sanare non possit, maiori tamen refrenat efficacia et angustioribus arcet limitibus, ac alia omnia remedia queunt.

Excretionem augens alvi, urinae et sudoris, duobus aliis morborum generibus medetur Oleum Tiglii, rheumatismo ac arthritidi, et morbis quibusdam viarum urinalium: qui lumbagini et arthritidi obnoxii sunt, solamen ex hac purgatione habent (Rumph.) aequae ac, qui articulorum et tibiarum inveteratis doloribus laborant (Costa). Convenit torminibus renum ex lithiasi; Indi etiam gr. T. clysteribus admiscent adversus urinae difficultates. Commendatur lignum ab Herrmanno, Costa, aliisque, in omnibus cacochymis et contra omnia venena; multumque sane prodesset, si speciebus lignorum admisceretur quibus utimur in huiusmodi morbis, arthritide e. g., syphilide, morbo scrophuloso et his similibus.

Olei Tiglii vires, quibus nervos peculiariter afficit, ad morbum maxime dolorificum, prosopal-

1) Americ. medic. record, T. V. p. 615.

giam fugandum Pearson 1) adhibuit; et prosopalgiam guttis duabus, quinimo una huius remedii ad linguam applicatis, nonnunquam lenitam, imo radicitus propulsam esse legimus in Americ. medic. record. T.V. p. 189: additur ibi, effectum in momento applicationis apparuisse. Hermannus narrat, in passione hysterica Indos lignum dare in pulverem redactum, grana dena in infuso Theae vel Lavendulae propinantes.

§. 15.

Oleum hoc efficacissimis adnumerandum esse remediis, et cautissima manu adhibendum esse, ne inflammationes aut alia incommoda procreet, ex relatis elucet. Narrantur apud nonnullos scriptorum quos iam saepe allegavimus, exempla ploratu digna effectuum funestorum quos praebet hoc medicamentum, incaute, aut ab insciis et sceleratis hominibus adhibitum. Diligente igitur perscrutatione opus est, quatenam corporis conditiones Oleum Tiglii sumi vetent. Ad alvum movendam adhiberi non posse, ubi purgationibus omnino locus non datur, neminem certe fugiet, neque verba faciamus ultra hac de re, quae ad nos non attinet. Restat igitur, ut inquiramus, num sint morbi, qui olei huius usum vetent, nec ne. Hanc

1) Graefe u. v. Walther Journ. T. IV. p. 184.

unam inveni a multis pronunciatam esse contraindicationem, intestinorum irritationem et inflammationem; verumtamen et ne hae quidem medicum peritum prohibere valent, quominus hoc oleo utatur si alvi excretiones nullo alio purgante elici possint: testimonio nobis sunt exempla quae sequuntur. Iam Costa iliakis colicisque doloribus et saevissimae cholericæ passioni hoc medicamento medebatur; Berends 1) non dubitat in tympania id adhibere, in colica saturnina Kinglake; et vel in intestinorum inflammatione semel datum esse oleum felici cum eventu Jliff 2) refert. Nullus igitur est morbus qui oleum hoc omnino vetet adhiberi, si alvi ductio desideratur: medici practici nunc est singulis morbis singulisque morborum temporibus et aegrotorum constitutionibus eius applicationem adaptare.

§. 16.

Ab antiquissimis iam temporibus singulae Crotonis Tiglii partes in usu fuerunt, non solum in patria sua verum etiam in Europa. Serapion minor, unus e veterrimis Arabum scriptoribus de materia medica, qui scripsit saeculo decimo, in libro suo: de Simplicibus Cap. 261. granor.

1) De Tympanitide diss. F. Schmidt. Berol. 1825.

2) Americ. med. record. T. V. p. 376.

Tigl. mentionem facit. Costa anno 1561 primam ligni Panavae notitiam se accepisse narrat; granis T. vero iam antea usus fuerat ad aves capiendum: utriusque medicamenti vires in libro de aromatibus exponit. Teste Rumphio eo tempore quo Lusitani Amboinae imperabant, grana Tiglii parum adhibita, radices contra ibi in usu fuerunt, atque circa annum 1630 non tantum per totam Indiam, sed etiam in Europam transmissae sunt. Exstant duae litterae Arti Gisellii (Rumph.) septimi Amboinae gubernatoris, in laudem radicis Croton. Tigl. scriptae, quarum priores cum cistula radices continente in Europam missae sunt anno 1632. Petrus Borellus in libro suo: *Histor. et observat. med. phys.* Paris. 1657 Cent. IV. 1) olei expressi mentionem facit, item Hermannus anno 1710 et post eum Geoffroy et Lewis in operibus suis de materia medica. Grana Tiglii in officinis nostris ab istis inde temporibus semper reservata sunt, verum ob acredinem suam et effectus funestos quos procreabant interdum, a medicis circumforaneis imprudenter adhibita, e medicaminum apparatu exulabant, donec nostris temporibus ab anno inde 1820 Conwell in Anglia Tiglii oleo primus uti incepit. Hunc secuti sunt permulti medicorum Angliae, Italiae, Galliae, Ger-

1) Hufeland's Journ, April 1825. p. 16.

maniae, Americae septentrionalis, quorum laudibus et commendationibus permoti haud multum sane temporis praeteribit, quin medici practici omnium terrarum hoc medicamen in usum vocabunt. Ut divulgaretur huius remedii notitia, plurimum in Germania contulerunt Schneider, Hufeland, Horn, Rust, Graefe, Froriep, Buchner, Brandes. Invenimus etiam in operibus quae nuperime prodierunt de materia medica, oleum hoc uberius pertractatum esse, quorum sunt:

Ainslie Materia med. Madras 1813 (cf. Magendie l. c.)

John Eberle a Treatise of the Mat. med. Philadelphia 1822 (p. 456.)

Pfaff System der Mat. med. Leipzig 1822 (T. VII p. 49.)

Sundelin Handb. d. spec. Heilmittellehre Berlin 1825 (T. II. p. 525.)

Huc pertinet quoque:

Magendie Vorschriften zur Bereitung u. Anwendung einiger neuen Arzneimittel a. d. Franz. v. Kunze Leipzig. 1824. (p. 107.)

Richard Formular- u. Receptaschenb. a. d. Franz. 1823 (p. 295.)

Mentio huius olei facta est etiam in libris qui de venenis agunt, e. g. in Toxicologiis quas scripserunt Orfila et Buchner.

§. 17.

In libris illis de Toxicologia, et apud ceteros scriptores qui de Oleo Tiglii agunt, antidota nobis sunt praescripta, quibus nocivos eius in homines effectus illico minuere vel irritos reddere polleamus. Summopere laudatur a Costa et Hermanno aqua frigida, qua si caput perfundatur avibus, quae seminibus fructae ab aucupibus iis expositis, sopitae ac stupidae decidissent, eas reviviscere ille narrat; Hermann. vero his utitur verbis „alvus (quam hoc oleo duximus) in momento sistitur, si superbibitur haustus largior aquae frigidae, vel si pedes madescent aqua, vel si manus laventur aqua frigida et naribus admoveatur.“ Involventibus porro, mucilaginosis, iusculis pinguibus, lacte, decocto hordei vel oryzae et his similibus obtunditur ac illud, quod Acida vegetabilia, imprimis Acid. aceticum, A. citricum, A. tartaricum optime innoxium reddunt (Frost, Eberle, alique); ad alvi deiectiones sistendas, opium etiam multum valet.

§. 18.

Cum oleum ingratissimo sit sapore, ita ut merum summis sine incommodis assumi non possit, medici ei addunt alia medicamina, quibus hanc inoptatam corrigant indolem. Duplici verum modo hunc finem assequi possumus, altero granis,

priusquam oleum ex iis paratur aut dum paratur, acredinis partem subducendo; altero, oleo ipsi corrigentia addendo. Primum genus exulat ex hodierna medicina, non enim certo scire possumus, quantum acredinis amiserit oleum, hoc modo paratum, cuius efficaciam ambiguum esse, inde sequitur. Sunt huiusmodi praeparationes torrefactio seminum sub cineribus (Geoffroy), coctio cum aceto vel urina puerorum (Herm.) etc. Corrigentium magnam auctores singuli afferunt copiam: mucilaginosa vero, emulsiones, lac, pingua et oleosa, mellaginea, dulcia, aromata, olea aetherea laudantur ad omnibus; adiicit insuper Hermannus Saccharum Saturni et Opium, et White (cf. Hufel. l. c.) singulis dosibus grana duo Extracti Catechu a nonnullis addi refert.

§. 19.

Lignum Pavanae quale apud nos prostat, dare possumus in infuso et decocto a drachmis duabus ad unciam dimidiam; nucleorum granum unum (Rumph) ad quinque (Hermann.); extracti, beneficio spiritus vini parati, grana tria ad quinque (Herm.); Oleum Tiglii a guttae parte octava (Hufel.) ad guttas tres (Magendie).

Datur oleum in emulsionibus (e. g. ex vitello ovi vel Amygdalis paratis) cum oleis pinguibus mixtum, cum syrupo quodam sub forma

linctus (Magendie), in pilulis, cum vino (Rumph) in spiritu vini solutum 1), pulveribus exceptum.

Formulas liceat nonnullas afferre experientia probatas, quas praescribens medicus olei effectus salubres consequetur, remotis omnibus nocivis.

Rec. Ol. gr. Tigl. expr. guttam unam
exhibe cum

Ol. expr. Ricini vulgaris cochleari di-
midio

(vel Ol. Amygdal. dulc. rec. expr. co-
chl. uno)

exhibe pro purgante (Herrmannus.)

Rec. Ol. Tiglii guttam unam

Ol. Papaveris unciam

m. s. pro dosi cochlear detur (Hufeland)

Olei hac mixtione compositi cochlear unum eosdem praebet effectus, ac Olei Ricini dosis media, quod multis experimentis in instituto polyclinico, quod Ill. Hufeland directore Berolini floret, stabilitum vidi. Hac insuper praestantia fruitur oleum hoc (ol. Ricini artificiale iure nominandum), quod viliori ematur pretio ac ol. Ricini, cuius viribus non tantum aequiparandum est, sed

1) Jam Rumphius tincturam quandam commemorat his verbis: rasae seu contritae radiceis digitabulum sumitur, infunditurque debili potu Arak.

interdum etiam anteponendum, ubi hoc, per longum tempus repositum, rancidum factum sit.

Rec. Ol. Tigl. guttam unam

Ol. Caryophyllor. guttam unam

Confect. Rosae gallicae grana quatuor
m. et sit pilula (Frost.)

Rec. Extr. Jalapp. aquos. drachm. dimid.

Ol. Tiglii guttas tres

m. f. pilul. granor. duor. consperg. pulv.

Lycopod. d. sumatur omni bihorio pilula
una (Schneider)

Rec. Ol. Tiglii guttam unam

Pulv. sapon. medicat. scrupulum dimidium

m. exactssm. f. pilul. Nr. sex; detur pilula
una cum lacte, et lac superbibatur (Graefe)

Formari possunt etiam pilulae cum mica panis, cum succo Glycyrrhicae, similibusque.

Rec. Solut. alcoholic. de Crot. Tigl. drachmam
dimidiam

Syrupi simplicis

Mucilag. Gummi arab. ana drachmās tres
(Conwell.)

aut

Rec. Alcohol Crotonis Tiglii drachm. dimid.

Syrupi simplicis

Mucilag. Gummi arab. ana drachm. duas

Aq. destillat. unciam dimidiam

m. fiat haustus (Nimmo) 1).

Rec. Ol. Tiglii guttas duas ad tres

Sacchar. alb. unciam dimidiam

m. f. pulv. s. omni bihorio quantum
cochlear parvum capere potest (Schnei-
der)

Rec. Ol. Tiglii guttam unam

Sacch. alb. drachmas duas

m. f. pulv. divid. in octo partes aequales,
cuius pars singula valet pro dosi (Hufeland)

Hanc secuti experientiam, quod oleum Tiglii
purgativam vim suam exercet et si naribus ad-
moveatur, aut odor eius tantum naribus excipia-
tur; Indi pomum regium catharticum ex eo pa-
rant, quod Hermannus sequenti modo confici iu-
bet: „Recipe olei expressi gr. Tillii quantum
vis; huic immitte pomum aurantium seu citreum
et relinque per mensem integrum, post exime et
adsperge pulvere Santali citrini; admove naribus

1) E guttis duodecim olei Tiglii quod Short venale
dimittit, duas tertias partes in Alkohol uncia dimi-
dia solvi, et omnem, quae huic oleo inerat, nunc
solutioni inesse vim purgativam, Pfaff l. c. auctor
nobis est. Sequitur drachmam dimidiam huius so-
lutionis eandem esse dosin ac olei gutta una cum
tertia guttae parte; Alkohol Crotonis T. quo Nimmo
utitur, easdem servat proportionem, Gerson u. Julius
Magazin. T. IV. p. 112.

ad alvum movendam, vel frica hoc pomo fortiter manus et admove naribus: quotiescunque pomum naribus admovetur eiusque odor fortiter attrahitur, toties movebitur alvus.“

Exstant etiam formulae oleum ad purgandum externe adhibendi, quales sunt quae sequuntur:

Rec. Unguent. de Arthanit. drachmam unam
Ol. Colocynthid. drahm. unam et dimid.
Ol. gr. Tiglii expr. guttas duodecim
m. f. linimentum quo inungatur abdomen
(Hermann.)

Rec. Ol. nuc. Jugland. unciam unam
Ol. Tiglii guttas tres ad quatuor
m. f. linimentum quo illiniatur regio umbilicalis (Schneider)

Adn. Hermannus hoc oleo etiam in inflammatis haemorrhoidibus caecis et carunculis anixedendis usus est et hac quidem forma:

Rec. Ol. expr. gr. Tiglii guttas quinque
Sacch. Saturni par
m. f. linimentum quo inungantur haemorrhoides coecae et carunculae ani; ter vel quater de die repetatur.

§. 20.

Efficacissimum remedium hoc antea a multis omnino reiectum erat, nimiam acredinem eius veritis; et eximia quidem vehementia id agere,

ita ut effectus teterrimos procreare possit, qui veneni nomen apud multos haud immerito ei pararunt, negare non possumus, inmo affirmandum nobis est potius, perniciosissimum et revera venenum id fieri, ubi ab insciis adhibeatur: quo si utatur medicus peritus, veterum et recentiorum observationes ac relationes religiose perpendens, summa praestat emolumenta Oleum Tiglii, cuius vires investigando, et cognitis multos morbos superando, medicina hodierna respondet spei qua nisus est Hahnemann, temporibus scilicet futuris hoc esse reservatum, ut mitissimos effectus validissimis producere discamus medicamentis. Quamvis enim irriter Oleum Tiglii, et maxima agat vehementia; saluberrimos nobis praebet et sufficientes effectus cauta eius suppeditatio. Marshall guttam eius unam idem valere asseverat ac Ialappae drachinam, Hydrargyri muratici mitis grana sex, Salis Epsomensis unicam; Iliff, cui Extract. Colocynthis compositi grana decem pulv. rad. Rhei grana sex, Calomel. granum unum alvum ducere non potuerant, viginti quatuor horis praeterlapsis Olei Tiglii guttam dimidiam sumsit, quae post horam unam et dimidiam eum exoneravit.

Sed iam satis de efficacia olei permagna de qua nemo dubitat; transeamus ad contemplationem effectuum quibus stipatae doses eius minutae, quales ad-

libere consuevimus, alvum ducunt. Audiamus prae ceteris, quae Costa scripsit in laudes huius medicaminis, his usus verbis: „— — huc accedit quod neque foetorem neque taedium, neque metum dum sumitur pariat, possitque sine diaetae observatione etiam iis, qui sua negotia foris peragunt, propinari.“ Conwell, Marshall, Tantini, Buchner hanc nobis dant descriptionem: praeteritis octo ad decem horae sexagesimis partibus post olei ingestionem, exoritur debilitatissensus, pulsus debilis, parvus; calor in superficie totius corporis parum minuitur, in abdomine caloris aucti sensus percipitur; tum pulsus evadit fortior, plenior, et calore cutis rursus adaucto, sudores prodeunt e tota plerumque corporis superficie: percipiuntur intestinorum motus, interdum etiam tormina leviora, et post horam dimidiam, vel duabus horis post ingestionem olei, alvus solvitur pluries, ita ut sexies ad vicies faeces et fluida serosa evacuentur.

Scriptores recentiores omnes qui mentionem faciunt Olei Tiglii, plerumque sine doloribus colicis, sine nausea et vomitu alvum ab eo purgari referunt; quod si vomitum moveat et dolores, alia purgantia drastica idem certe perfecissent, aut idiosyncrasia forsitan accusanda est; nec obliviscamur, omnia purgantia nunquam fere vim suam exserere, quin incommoda quaedam pariant. Laudandum est contra, Oleum Tiglii, et si vomitum civerit, nihilo tamen minus omnem suam vim purgativam exercere, ita ut inter medicamina alvi excretionem provocantia, quoad effectum certum et non deficientem, primum locum ob-

tinere videatur. Non equidem omnibus reliquis purgativis undique anteponendum esse censeo hoc meum oleum, sed multas potius existere conditiones, quibus alia medicamina huiusmodi melius conveniant, libenter confiteor: nihilominus tribus illis, quas Conwell posuit indicationibus, omnino hoc oleum respondere, et omnibus reliquis anteponendum esse censeo; et sunt quidem hae:

1. ubi purgantia cetera quae habemus, iam adhibita sunt sine successu.

2. ubi alia medicamina huiusmodi ingerere non possumus, quia aeger ea deglutire noluit aut non valet.

3. ubi remedio nobis opus est quod alvi solutionem quam citissime praestat.

CURRICULUM VITAE
EX DECRETO
GRATIOSI MEDICORUM ORDINIS
BEROLINENSIS ADIECTUM.

Ego Gustavus Leopoldus Cruse Regiomonti Borus-
sorum natus die XIV Novembris a. MDCCIC paren-
tibus gaudeo adhuc viventibus, patre Ioanne Chris-
tiano Cruse utriusque Medicinae Doctore et Medico
practico apud Regiomontanos, matre e gente Goebel,
unus quatuor filiorum solus superstes. Puerum a
praeceptoribus, singularem in me operam ponentibus
edoceri curabat pater; annum degens decimum
quartum, gymnasium, cui nomen Collegium Fridericia-
num, quod floret direttore Dr. Gothold, frequentare
coepi, ibique per annos quinque et dimidium artibus
instructus, testimonio maturitatis exornatus anno
MDCCCXIX dimissus sum ad universitatem litterarum
Albertinam, cuius civium numero me adscripsit Ill.
Wald t. t. Prorektor Magnificus d. X Aprilis; medi-
corum albo Ill. Burdach t. t. Decanus quam maxime
spectabilis.

Legi Regis nostri Clementissimi obediens, quae
inventutem militare iubet, eques militavi per annum,
simulac civis academicus factus eram.

Sub finem anni MDCCCXXII universitatem lit-
terariam Berolinensem petivi, ubi ab Ill. Wilken

Rectore Magnifico d. XVI Octobris in civium numerum receptus et ab Ill. Link t. t. Decano quam maxime spectabili Med. studiosis adscriptus sum.

In utraque universitate hasce audi vi viror. Illustrissimor. praelectiones: Cel. Herbart de Logica, Psychologia et Philosophia practica, Cel. Lobeck Aristophanis interpretantem Equites, et Sallustii bellum Jugurthinum; Ill. Hagen de Technologia; Ill. G, Hagen de Physica et Chemia, experimentis illustratis; Cel. de Baer de Anthropologia. Anatomiam docuerunt Ill. Burdach et Cel. de Baer; Zoologiam et Zootomiam Cel. de Baer, Encyclopaediam et Methodologiam medicam, Botanicen, doctrinam de plantarum viribus Cel. Eysenhardt; Physiologiam Ill. Burdach; Materiam medicam, Therapiam morbor. acutor. Cel. Richter; Chirurgiam et Ophthalmiatricen Ill. Unger, Pathologiam generalem Cl. Hecker; Pharmacologiam Ill. Link; Anatomiam pathologicam Ill. Rudolphi; de Magnetismo et Electricitate Cel. Erman; Pathologiam et Therapiam specialem, Therapiam specialem morborum syphiliticorum et morborum mentis Ill. Horn; Semioticen pathologicam, Therapiam specialem morborum tabificorum Ill. Berends; artem obstetriciam Ill. de Siebold et Ill. Kluge; artem fascias imponendi simulque de ossibus fractis et luxatis Ill. Kluge; Akiurgiam Cl. Juengken. Ad clinicen practicam mihi duces fuere viri Ill. Hufeland Graefe, Rust, Neumann, de Siebold, Kluge.

Jam vero tentamine et examine rigoro coram gratioso medicorum ordine rite superatis, spero fore, ut dissertatione hac et thesibus palam defensis, summi in Medicina et Chirurgia honores mihi impertiantur,

THESES DEFENDENDAE.

I.

Foemina utero gestans, menstruare non potest.

II.

Non datur febris essentialis.

III.

Omnis exanthematis eruptio est crisis.

IV.

Non est morbus qui quodvis medicamentum absolute repudiet.
